

La Lettre Jèrriaise 21.06.2021

Bouônjour bouonnes gens, ch'est Ben Spink tch'a l'pliaisi d'vos présenter La Lettre Jèrriaise aniet, Sanm'di lé vingt-six d'Juîn, deux mille vingt-tch-ieune.

Eh bein, tchi pliaisi d'vaie l'solé acouo dans l'ciel et combein qu'ch'est mangnifique d'aver les jours si longs comme j'avons à chu temps d'l'année, dans l'mitan d'l'Été. Véthe, ch'est un mio triste qué les jours s'en vont dév'nîn pus courts, achteu qué j'avons pâssé la Saint Jean et lé vingt-tch-ieune dé Juîn, lé jour l'pus long d'l'année, ou l'solstice s'ous voulez.

Mais, j'espéthe qué j'éthons un tas d'cauds et brillants jours dévânt nous. Pour ma lettre aniet, j'avais l'idée que j'pâl'lais entouor chein qué j'faisons pour l'ensingn'nie et la promotion du Jèrriais achteu. J'avons un tas d'choses en allant. J'sommes sièx maît's et maîtresses achteu et j'éthons eune nouvelle maîtresse au mais d'Septembre. Dans l's écoles, les maît's et maîtresses sont à faithe un tas d'difféthentes choses.

Par exempl'ye, iun d'nos projets achteu, tch'a nom Alentou d'Jèrri, ch'est d'ensingni des leçons ès arlévées dans quatre écoles primaites tchi duthent deux heuthes, et tch' incluent un mio d'l'histouaithé et d'la géographie d'Jèrri, au même temps qu'apprendre du Jèrriais, bein seux. J'ensingnons étout un mio d'la musique, d'la dans'sie et d'la chant'tie Jèrriaise. L'idée est qu'les jannes gens s'en vont apprendre du Jèrriais au même temps d'gângni eune miyeuthe compréhension d'l'Île où'est qu'i d'meuthent.

Un aut' projet qué j'avons achteu ch'est d'ensingni des groupes des êfants parmi les pus jannes dans eune école primaithe. Preunmiéthement, i' faut les aïdgi à amender lus Angliais, épis i' s'en vont êt' prêt pour apprendre un mio d'Jèrriais. J'espéthons qu' si j'ensingnons des mousses si jannes, i' s'en vont apprendre lé Jèrriais pus aïsiement pus tard. Nou vèrra!

Dans chîng écoles, j'avons étout des pallions, tchi sont des leçons tchi prannent pliaiches auprès l'jour d'ensingn'nie à l'école. Ches leçons là sont des leçons raïque pour l'ensingn'nie d'la langue et i' duthent entre trente et quarante-chîn minutes. J'avons des leçons dans l's écoles s'gondaites étout et, achteu qu'j'avons pus d'maîtresses, j'espéthons qu'j'éthons pus d'étudgiants dans ches écoles quand l'année académique tchi veint c'mench'cha au mais d'Septembre.

Et bein seux, j'avons des leçons pour les adultes étout. J'é stèrtînmes deux nouvelles clâsses pour les c'menchants dreinement et i' 'taient tout plieines hardi vite! Dé pus, j'avons un aut' huitaine dé gens tchi sont sus la liste d'attente pour jouaindre la préchainé clâsse dé c'menchants, probabliément au S'tembre. J'avons des clâsses étout pour les adultes tchi sont pus avanchis.

J'espéthons étout d'aver, bêtôt, d's applicâtions et des sites d'ithangnies pour les ordinnateurs, pour les cheins tchi veulent apprendre lé Jèrriais. Ch'est partitchuliéthement împortant pour les jannes gens et les cheins tchi n'ont pon hardi d'temps, d'aver d'tchi en lingne pour qu'i' pièssent apprendre quand i' veulent.

Au même temps qu'tout ch'na, j'sommes à faithe un tas pour la promotion d'la langue. Achteu, j'sommes à faithe du travas pour asseûther qu'lé Gouvernement du Rouoyaume Unni s'en va ratifier la Charte Ôropéenne pour les Langues Régionales et Minnoritaites dé la part du Jèrriais.

Et pour finni, des bouonnes nouvelles! J'éthons bêtôt un nouveau groupe pour la convèrsâtion en Ville, au work-café Santander à Charing Cross. La preunmié réunnion s'en va êt' Lundi lé chîn d'Juillet à l'heuthe du dîner entre eune heuthe et deux heuthes, et les sessions s'en vont continuer duthant l'été. Ch'na veurt dithe qué j'pouôrrèmes caqu'ter en Jèrriais châque jour d'la s'maine entre Lundi et Vendrédi achteu. Tchi mangnifiques nouvelles!

Eh bein, j'pouôrrais bein continuer à janmais mais né v'la assez pour aniet. À bêtôt et à la préchainé!